

四庫全書

子部

欽定四庫全書

冊府元龜卷八十八

宋 王欽若等 撰

帝王部

赦宥第七

唐代宗以寶應元年四月己巳即位五月丁酉帝御丹鳳樓門下大赦天下制曰高宗嗣興諒闇成受終之禮康王承統翌日奉顧命之書况萬事尚殷蕭牆有釁蒼生佇望社稷謀安教雖達於通喪禮有變於金革順人

聽政僂俛從權朕頃從鑒輿率彼西夏佐成草昧俾掌  
戎車國步艱難睿圖廣運再清寓縣崇復宗社稟承命  
以受律敢貪天以為功聖慈弘深冊踐明兩奉承庭訓  
敢有怠遑嗚呼不弔昊天殃咎荐至皇祖之哀未釋閔  
凶之罰奄鍾攀號罔極若無天地誓終喪紀企及前王  
百辟抑予俾恭遺訓俯遂衆望嗣膺丕烈欽茲大寶懼  
不勝任若蹈春冰如集喬木日者先聖哀損朕在問安  
而閱牆構災凌長成禍閭闔作孽閭寺涓天職為亂階

潛置巫蠱將以竊弄覆我邦家賴良弼翊戴爪牙同德  
天道助順神理害盈昭此共工之心終貽管蔡之辱舍  
彼有罪咸伏其辜廢於離宮實於城頽今天衢雖泰率  
土未康式協公卿之心仰遵易月之命奉時斯在先甲  
未孚宜允人神覃茲渙汗可大赦天下自寶應元年五  
月十九日昧爽已前大辟罪已下已發覺未發覺已結  
正未結正繫囚見徒常赦所不免者罪無輕重咸赦除  
之自開元已來所有諸色犯累者並宜雪免左降官并

諸色流人及罰鎮効配軍團人等一切即放還其中有見任刺史縣令及正員者并依本任其四月十五日已後諸色流貶者與量移近處逆賊史朝義已下有能投降及率衆歸附者當超與封賞天下禁囚不得過五日所有推劾不得分外拷掠亦不得信友證便結罪名諸色文武官應在凌霄門內謁見者并飛龍射生等並宜以實應功臣為名諸州刺史與一子官刺史縣令入五品減兩考内外文武官三品已上賜爵一級四品已下

各加一階諸州刺史父母在無官者與致仕官及母邑  
號已亡歿者追贈諸州防禦使並停天下子為父後者  
各賜勲一轉州縣官自今已後宜令三考一替大官喪  
膳等特宜減省有涉奢侈一切宜停天下百姓逋租懸  
調貸糧種子諸色欠負官物一切放免開元乾元等錢  
並宜准一文用不須計以虛數益昌郡王邈進封鄭王  
延慶郡王迥進封韓王故庶人皇后王氏故庶人太子  
瑛鄂王瑤光王琚宜並復封號棣王琰永王璘及應安

祿山誑誤人反狀人等並宜昭雪建昌王追封為濟王  
崇恩王追封為衛王靈昌王追封為鄆王其有明於政  
理博綜典墳文可經邦謀能制勝及孝悌力田諸州刺  
史並宜搜揚聞薦投匭者不須勘以停處姓名務招直  
言以副朕意

十一月辛巳詔東都河北應受賊脇從署偽官并偽出  
身悉原其罪一切不問

廣德元年七月壬子御宣政殿下詔曰惟高祖太宗敷

大德於天下覆載之內湛恩茂育累聖同道用康兆人  
寶位重光深其德澤被服漸漬洽於生靈者百有五十  
年之間兵不作而刑將措矣自寇虐橫厲山東不開釁  
起渠魁毒流區宇三軍七萃之士豪傑忠良之徒制在  
風波遭其驅劫繇是干戈不息征賦寔煩哀我人斯並  
罹災患憫茲有犯無罪萬方朕上載皇天下臨黔首奉  
先聖之成命集一切之大勲元惡既誅羣生思乂是欲  
鏡清六合網決八紘庶齊大道之時克復太平之理至



化猶鬱兵嚴初解百辟卿士中外衆臣並進昌言請上  
號徽曰寶應元聖文武孝皇帝朕涉道日寡慚德良多  
恐沮樂推之心自增神器之重俯應典冊敬受鴻名便  
欲謁報昊天展事郊廟又以孟秋多稼垂及西成王畿  
之間人實勞止輟茲大禮式候玄冬切為踰年改元之  
制續承洪業敢廢舊章博採羣公之義乃貞協用之紀  
其實應二年改為廣德元年爰屬履端乃弘肆眚救茲  
湯火俾雲行而雨施滌其瑕穢將玉振而金聲宜廣更

始之恩用明嚮勸之福可大赦天下自廣德元年七月  
十一日昧爽已前大辟罪無輕重已發覺未發覺已結  
正未結正繫囚見徒常赦所不免者咸赦除之左降官  
即量移近處亡官失爵各與收叙諸色流人罰鎮効力  
安置配隸等一切放還其安祿山史朝義親族應在諸  
道一切原免並無所問天下所有諸色結聚羗渾黨項  
等但能悔過自陳各歸生業一切並捨其罪其中有頭  
首能勸率并束手來歸者并加官賞仍令本道防禦使

并本管刺史縣令分明曉諭所有到者各具名錄奏請  
百姓逋租懸調及一切欠負官物等自寶應元年十二  
月三十日已前並放免一戶之中有三丁放一丁庸調  
地稅依舊每畝稅二升天下男子宜二十五成丁五十  
五入老應徵租稅刺史縣令據見在戶徵科其逃亡死  
絕者不得虛攤隣保河北百姓復三年應是回紇行營  
經歷處免今年租稅内外文武三品已上賜爵一級四  
品已上加一階仍各賜兩轉天下兵馬元帥雍王智謀

夙成忠孝純至恭行討伐親統元戎撫外蕃以仁訓羣  
帥以義班師獻捷勲茂武成宜兼尚書令加實封二千  
戶回紇可汗冊為頡咄登密施合俱緣英義建功毗伽  
可汗可敦冊為娑墨光親麗華毗伽可敦可汗及左右  
殺内外宰相已下共加實封二萬戶令御史大夫王翊  
持節就衙帳冊禮左右殺胡祿都督等並封為王諸部  
督並封國公河北副元帥懷恩宜兼太保仍與一子二  
品官一子四品官並階更加實封五百戶河南副元帥

光弼與一子三品官并階更加實封三百戶幽州節度使懷仙與一子三品并階加實封二百戶李抱玉郭英乂辛雲京侯希逸田神功孫志直白孝德令狐彰并各與一子五品官并階加實封二百戶李寶臣薛嵩田承嗣張獻誠等各與一子五品官并階仍加實封二百戶魚朝恩寄崇師律程元振勲高佐命名各加實封二百戶仍與一子五品官並階僕固瑒高彥崇渾日進李建義李光逸楊崇光李懷光張如岳白元光溫如雅拓拔澄

泌高暉盧欽友成惟良曹楚玉等各與一子五品官加實封一百戶仍各賜鐵券以名藏大廟畫像於凌烟之閣并冠難已來將相勲業高者其名籍圖畫亦準此子儀與一子四品官并階實加封二百戶晉卿劉晏裴遵慶元載各與一子四品官并階加實封一百戶儀王及彭王已下男未官者并準舊例與官及封永穆并長樂已下長公主及郡縣主嗣王郡王等各與一子官皇親五等已上諸親三等已上各與一子出身二王後各與

一子官諸道節度觀察使立功將士其父兄在無官者  
依子文武與官已歿者追贈陣亡將士襲父官爵河北  
河南有懷材抱器安身節素在丘園不仕為衆所知委  
所在長官具名聞薦應授偽官等并已昭洗矜才宥過  
宜有甄收委所繇勘本官名銜資歷聞奏量才處分文  
武正員常叅官并諸州刺史父母無邑號官者宜與致  
仕官及邑號贈者更與改贈刺史縣令自今以後改轉  
刺史三年為限縣令四年為限員外及攝試官一切不

得釐務諫官每月上封事無所迴避河南河北偽度僧  
尼道士女冠並與正度天下刑獄須大理正斷刑部詳  
覆不得中書門下即便處分諸色人中有孝弟力田經  
術通博文詞雅麗政理優長本州各以名薦

二年二月戊子御鳴鳳門下詔大赦天下制曰惟我高  
祖太宗之有邦罔不昭事於上帝嚴恭敬畏與神合符  
七聖在天眷命永固朕嗣守鴻業敢忘奉先尚質貴誠  
聿修盛典頃以四方多難責在朕躬六侯行師日不暇



給東擒羯胡之首西禦犬戎之患元元告病社稷貼危  
內定外攘不遑展禮雖高明未達而精意惟勤克通至  
誠以錫純嘏蕃戎即叙弓矢載靈虔奉泰壇鑒寐接神  
祇之顧永保宗社歲時結霜露之思近又百辟在庭  
儼然而進奉請元子以居少陽冊命乃行鬯七攸主按  
風雨之清道乘星火之仲春朝於玄元格於藝祖躬執  
珪奠祇見南郊天何言哉神所勞矣敷兆人之戢穀廣  
四達之聰明式重燭柴之經益申解網之惠可大赦天

下自廣德二年二月二十一日昧爽已前大辟罪無輕重已發覺未發覺已結正未結正繫囚見徒常赦所不免者咸赦除之左降官即與量移近處亡官失爵放歸不齒之類并官已復資未得本階者各量與收叙諸色流人及量移人并罰鎮効力配隸等一切放還自克孽亂常王室多故干戈不息今已十年軍國務繁關輔尤劇念茲疲耗久困徵科其京城諸司諸使應配彊騎官散官諸色丁匠幕士供膳音聲人執祭齋郎問事掌閑

師并諸司門僕京兆府騎丁屯丁及諸色納資人每月  
總八萬四千五十八人數內宜每月共支二千九百四  
十四人令河東關內諸州府配不得偏出京兆府餘八  
萬一千一百一十四人并停所須衛役使宜樽節定數  
官給資錢不得干擾百姓其寶應元年十二月三十日  
已前諸色逋欠在百姓腹內者并放免天下戶口宜委  
刺史縣令據見在實戶量貧富作等第差科不得依舊  
藉帳據其虛額攤及鄰保其天下諸州府長史及縣令

有清白著聞善政稱最能招輯逃亡編附復業戶口增多者具狀聞奏朕當差人按覆與所舉狀同者超資進改天下所有諸色結聚及羌渾黨項等能悔過自陳各歸生業一切并捨其罪其中有能率先來降者仍特加官賞征人不息勤戍斯久丁壯疲弊老弱困窮光武有言頭鬚為白戢藏鋒刃牧養元元方面重臣宜悉朕意應諸州團練將士等委本道節度及諸防禦使等審與州府商議如地非要害無所防虞其團練人等並放營

農休息冠戎以來積有年歲徵求數廣彫弊轉深自今已後除正租稅及正救并度支符外餘一切不在徵科限内外文武官三品已上賜爵一級四品已下各加一階仍並賜勲兩轉武德元從功臣勲業特崇子孫沉翳者委所司勘責各與一人官成都靈武元從普恩之外三品已上更賜一級四品已下更加一階實應功臣普恩之外三品已上各與一子六品官賜爵一級四品已下各加兩階更賜勲兩轉五品已上官子為父後者賜

勲兩轉副元帥光弼子儀各與一子三品官并階諸道  
節度使各與一子五品官并階都防禦使及經畧等使各  
與一子六品官并階去歲行幸陝州六軍英武威遠威  
武寶應射生衙前射生左右步軍等并内外文武百官  
扈從到行在者三品已上與一子官四品已上各加兩  
階自陝州至上都已來置頓使及州府長官普恩之外  
各與一子出身置頓使判官已下緣路縣令及專知置  
頓官各加一階其六軍神策寶應射生衙前射生及左

右步軍英武威遠威武等諸軍左右金吾將士緣大禮  
扈從及在城留從者共賜錢五萬貫鴻臚蕃客共賜錢  
一千貫儀王及彭王已下諸王男未有官者並準舊例  
與官其已封為郡王國公者及永穆長樂已下長公主  
及諸郡縣主并嗣王郡王各與一子官皇親五等已上  
諸親三等已下各與一子出身二王之後各與一子官  
臺省之官事資履歷刺史縣令任在親人職務所更是  
為理本其左右丞侍郎御史中丞等取曾任刺史者郎

官亦取曾任縣令者并所選御史亦宜於錄事叅軍縣令中簡擇仍須資歷稍深者其有官非累厯才行特堪任用者自布衣已下任所在聞薦委中書門下尚書省考試堪任者不在此限尚書省政理所繫左右綱轄攸歸比來百司職事皆廢宜令明徵式令舉所職百官有論時政得失并任指陳事實具狀進封必宜切直無諱有司白身人亦宜準此任詣匭使進表朕將親覽必加擇用朕每思素儉敦以淳風必約嚴章以齊侈俗其珠



玉器玩寶鈿雜繡等一切禁斷諸攝官頻有處分一切  
盡停尚聞因循其弊未革即宜申明舊勅勒停三年之  
喪謂之達禮自非金革不可從權其文官自今已後并  
許終制一切不得輒有奏請緣大禮應升壇殿行事者  
普恩之外更與一子官應在太清宮郊廟諸色職掌者及  
冊皇太子行事官撰冊并書文及檢校造冊官普恩之  
外三品已上賜爵一級四品已下加一階仍賜勲一轉  
天下耆老九十已上版授刺史七十已上版授上佐縣

令孝子順孫義夫節婦旌表門閭終身勿事五獄四瀆  
名山大川今古聖帝明王忠臣義士宜令所管致祭

永泰元年正月癸巳朔御含元殿大赦天下制曰協五  
紀者建號以體元受四時者布和而順氣天心可見人  
欲是從爰立大中之道式受惟新之命朕嗣膺下武獲  
主多方顧以薄德乘茲艱運式虞問罪今已十年飲至  
策勲雖凶渠之授首勞師黷武豈人主之用心况乃軍  
役屢興干戈靡定茫茫士庶斃於鋒鏑噫皇穹以朕為

子蒼生以朕為父至德不能以被物精誠不能以動天  
俾我生靈擠於溝壑非朕之咎誰之過歟朕所以馭朽  
懸旌坐而待曙勞懷罪己之念延想安人之策亦惟羣  
公卿士百辟庶寮咸聽朕命叶宣乃力務履清白之道  
還興淳素之風率是黎元歸於仁壽君臣一德何以尚  
之廼者刑政不修惠化未洽既盡財力良多抵犯靜惟  
哀敬實軫於懷今將大振維綱益明懲勸肇舉改元之  
典弘敷在宥之澤可大赦天下改廣德三年為永泰元

年自永泰元年正月一日昧爽已前大辟已下罪無輕重已發覺未發覺已結正未結正繫囚見徒常赦所不免者咸赦除之僕固懷恩戰伐有功許謀任重不終臣節輒肆姦凶妄誘異蕃同為不軌朕惟務責已情重舊勲如能翻然來歸必從寬宥其下偏裨等因被驅率不獲已者所在山谷草竊反側未安者如能束手而來一切竝無所問自廣德元年已前天下百姓所欠負官物一切放免在官典腹內者不在免限其百姓除正租庸

外不得更別有科率刺史縣令與朕分憂彫瘵之人切  
須撫字一夫不獲情甚納隍有能招輯逃亡平均賦稅  
增多戶口廣闢田疇清節有聞課效尤著者宜委所在  
節度觀察具名聞奏即名按覆超資擢授其有治無能  
政迹涉賊私必當重加貶奪永為殿累農政本也食人  
天也方春之首重於東作除軍興至急餘一切竝傳令  
百姓專營農事其逃亡復業及浮客情愿編附者仰州  
縣長吏親就存撫特令賦役全不濟者量貸種子務合

安集孝弟力田懷才抱器遺逸未經薦達者各委州府  
聞奏親當策試量能叙用應自立仗諸軍將士等宜共  
賜錢五萬貫書稱咸秋詩美懷柔仰惟衆靈念茲多祐  
其五嶽四瀆名山大川宜令所管牧宰精誠致祭中外  
寮吏各揚其職無使曠官克副朕意

大厯元年十一月甲子日長至制曰王者欽若昊天誕  
受丕命莫不協五紀而成運稽三微而體元上齊璿衡  
下立人極乃頒厯於惟歲更覃恩於率土朕嗣守鴻業

恭臨寶位頃以時當寇難運屬干戈誓衆興師為人除  
害實賴宗社降福寰宇小康用興淳樸之風庶洽雍熙  
之化乾坤敷祐大庇生靈文武協心同力王室豈朕薄  
德而臻於此乃者金草所聚綿厯歲時征賦頗繁人猶  
彫瘵是用疚心疾首當宁而興懷罪以在予馭朽而貽  
懼每思弘濟之道用拯黎元之艱月躔星昴律中黃鍾  
合天正之符承日至之永祥雲在矚既當伯趙之司惠  
澤布和宜順一陽之氣建元發號革故維新俾及履長

之節用深行慶之典可大赦天下其永泰二年宜改為  
大厯元年自大厯元年十一月十二日昧爽已前大辟  
罪已下已發覺未發覺已結正未結正繫囚見徒罪無  
輕重常赦所不免者咸赦除之長吏犯贓不在免限夫  
從簡之道大易至言薄賦之規前王令範朕志遵儉約  
務欲息人徵歛無期誠為勞弊天下百姓除正租庸及  
軍器所須外不承正勅一切不得輒有科率國以人為  
本人以農為業頃繇師旅征稅殷繁編戶流離田疇荒



廢永言牧宰政切親人其刺史縣令宜以招輯戶口墾  
田多少用為殿最每年終委本道按察使節度等使案  
覆聞奏如課績尤異當加超擢或正理無聞必實科貶  
逃亡失業萍泛無依特宜招撫使安鄉井其逃亡復業  
者宜給復三年如百姓先貨賣田宅盡者宜委州縣取  
逃死戶口田宅量丁口充給仍仰縣令親至鄉村安存  
處置務從樂業以贍資糧王畿之間賦歛尤重百役供  
億當甚艱辛哀我疲人良多憫念盍徹之稅著自周經

未便於人何必行古其什一稅宜傳周徵後造漢辟賢  
良垂之典謨永代作則天下有安貧樂道孝弟力田未  
經薦用者委所在長官具以名聞奏朕當親自策試量  
才叙用其立仗將士等宜賜物五萬疋五獄四瀆名山  
大川祀典攸存裡理昭著宜以禮致祭

四年七月癸未詔曰至理之代先德後刑上歡心以臨  
下下欣然而奉上禍亂不作法令可施去聖久遠薄於  
教化簡書填委獄訟繁興苛吏舞文寃人致辟思欲刷

心改行厥路無繇豈天地父母慈愛之意也朕主三靈之重託羣后之上夕惕若厲不敢荒寧內訪卿士外咨方岳日不暇給八年於茲而大道淳風鬱而不振四郊多壘連歲備邊師旅在外役費尤廣賦輿轉輸疲耗吾人困竭無聊窮斯濫矣下庶闇昧不見刑網戎士在軍未習法令犯禁抵罪其徒實繁狴牢之間未詳事實吏議不決動淹時序傷沮和氣數彰咎徵此皆朕之不明教之未至上失其道而繩下以刑敢不罪己以荅災眚

且人者君之支體害之則君有傷刑者教之輔助失之則人無所措慮有冤濫慘然憂傷用明慎罰之典俾弘在宥之澤其天下見禁囚死罪降流流已下罪釋放其左降官及流人移隸等並與量移仍為所司即勘責送名中書門下奏聽進止如聞州縣官比來率意恣行羈杖不依格令致使殞斃深可哀傷頻有處分仍聞乖越自今已後非灼然蠹害者不得輒加非理仍委觀察節度使嚴加捉搦勿令有犯錄名聞奏宣示中外宜悉朕

懷

五年三月丙戌制曰古者以季春之月布德行惠恤刑振乏朕親執犧牲玉帛獲奉於上帝神祇九年於茲矣克已思理明不能燭昆夷未叙王畧猶虞歲募三秦之師日有千金之費悲索敝賦疲於餽軍侯甸之間徵求耗竭百穀翔貴關中小歉窮則斯濫安能懼刑困而成盜多有犯法至於軍戎之士致使廩賜不充因之逃亡或抵邦憲事非獲已情亦可察近以露濡之恩明發有

懷屬禁火之令節方薦鮪於園寢聖祖敷祐景靈告祥  
先天後天載荷嘉貺以陰以雨又助發生固宜順曲成  
之仁布惟新之命赦罪育物曠然滌除其京兆府及三  
輔并京城內諸司諸使見禁囚犯死罪已下特宜釋放  
其有犯未發覺者罪無輕重一切赦免如妄有論告以  
其罪罪之官典犯賊不在免限六月以來以彗星始滅  
赦下制曰惟辟奉天作人父母若天垂戒於上人不安  
於下則修德勤政以達至誠恤刑獄之寃滯問閭閻之

疾苦招納諫諍方求良弼允迪前烈率繇茲道朕獲承  
宗廟之重託於王侯之上夙夜齋慄莫敢荒寧推誠以  
撫萬邦屈己以安百姓憂勤之志日慎一日服御之給  
損之又損而涉道猶淺燭理不明國經王度多有廢闕  
加以寇戎聚犯軍國煩勞賦重人竭因之歲歉田荒業  
廢逋散相仍每深怵悼頻有蠲降兼亦簡求良吏以惠  
矜人除去姦冗用達幽枉大變風俗更張刑政異人和  
之漸洽荷天書之累彰固以朕德之寡昧化之哀薄其

咎不遠在予一人亦繇郡邑之政未盡條理或貪以害  
物或擾以傷農有凌弱暴寡之寃有不均失中之政人  
無所措多陷刑辟蓋上之教導未至豈忍以文法繩之  
慘然憂嗟深自隱慝雖靡草麥秋之後方斷薄刑而南  
風長養之時宜寬庶獄大決疏網與之更新其天下見  
禁囚徒死罪並降徒流流已下並釋放內外文武官及  
前資官六品已下并草澤中有碩學專門茂才異等智  
謀經武諷諫主文者仰所在州府觀察牧宰精求表薦



如其中搜揚未盡遺逸林間者即宜詣闕自舉親當策  
試量能擢用朕覽漢文詔書至陽和之時草木羣生之  
類皆有以自樂而吾百姓或陷於死亡而莫之省緬然  
遐想感歎增懷哀今之人又甚於昔思有瞻恤俾安其  
居觀察節度使及刺史各宜訓勵所部使奉科條變貪  
官之節激循吏之行其清白明著政理殊尤者具以名  
聞必加獎擢若冒干貨賄紊我紀綱切宜糾按當峻刑  
憲其官人犯賊經恩免罪者並宜申報中書門下及所

司不得容其抑止自王室多故積有歲時皆我文武之  
臣中外戮力今天下既定崇德報功與之剖符傳代不絕  
至於莅官述職各宜明慎典刑宜慶子孫永以為戒於  
戲武德貞觀之間有若魏徵王珪李靖李勣房玄齡杜  
如晦等扶翼大運勤勞王家尊主庇人匪躬致命咸有  
一德格於皇天緬然長懷風烈猶在其後嗣沈翳特加  
優獎如廟宇荒毀即宜修葺無德不報何日忘之其有  
鰥寡孀獨老幼貧窮不能自存者委州府縣長吏取諸

色官物量事賑給仍仰招攜戶口勸課農桑應所在州府  
首興工役處非灼然急切者宜並停五嶽四瀆名山大  
川神明所居風雨是主宜委中書門下分使致祭以達  
精誠孝子順孫義夫節婦事迹明著者特加旌表頒示  
中外知朕意焉

七年五月乙未制曰濟於道者化醇而刑措善於理者  
網舉而網疏朕涉道未弘燭理多昧嘗亦遐想太古高  
揖玄風保合太和在宥天下蓋德薄而未臻也是用因

時以設教便俗以立防務盡平恕用申哀恤又教淺而  
多犯也加以邊虞未戢徭賦猶繁荒廢之餘寇攘斯起  
遂令園土嘉石之下積有累囚竹章牙簡之中困於法  
吏屬盛陽之候大暑方蒸永念狴牢何堪鬱灼所以沮  
傷和氣感致咎徵天道人事豈相遠也如聞天下諸州  
自春已來或愆時雨首種不入宿麥未登哀我矜人何  
恃不恐皆繇朕過益用懼焉惕然憂嗟深自咎責所以  
減膳徹樂別居齋官禱於神明冀獲嘉應仲夏之月靜事無

刑以助晏陰以弘長養斷薄決小已過於麥秋繼長增  
高宜順乎天意可大赦天下其大厯七年五月十五日  
昧爽已前已發覺未發覺已結正未結正應天下見禁  
囚徒罪無輕重一切並宜放免所在不須類例聞奏宜  
令諸道節度觀察及州牧縣宰等於當管內所有名山  
靈迹各精誠致祭所降甘露異獲豐稔永思流弊庶振  
風猷其巴南諸州仍歲水旱迫於凍餒或致流離因有  
剽求苟全性命懼刑網之所及姑哨聚以相依抑有繇

焉蓋非獲已永言其弊用軫於懷如能相率來歸各安  
生業並無所問咸許自新宣示中外咸使知悉

八年五月壬辰曲宥京城內見禁囚徒並釋放是月癸  
卯制曰自古帝王順時行令當北至之災燠應南風之  
長羸必事無刑解網申惠叙麥秋之氣而代天理物矣  
朕獲奉珪璧虔恭郊廟一紀有餘承累聖之鴻業為兆  
人之父母戰戰兢兢恐不克濟而天地幽贊陰陽化育  
關輔之內農祥薦臻嘉穀豐衍宿麥滋殖閭閻之間倉

廩皆實百價低賤寔曰小康此皆上帝報貺烈祖儲社  
卿士存誠黎元盡力之效思與萬方百辟咸共樂之而  
未能也况或抵常憲累然就拘辨對官曹幽閉獄戶永  
惟械繫之慘追復冒犯之繇皆自王化之未醇風教之  
多闕俾民忘耻格俗虧禮讓陷在刑典久於狴牢當順  
陽助生之時積寬赦感傷之氣百姓有過在予一人顧  
謾欽恤誠切傷痛用申在宥之旨庶洽惟新之令自大  
厯八年五月二十五日昧爽已前天下繫囚見徒及已

發覺未發覺已結正未結正死罪並降徒流流已下罪  
並宜放免敢以赦前事相言告者以其罪罪之亡命山  
澤挾藏軍器百日不首復罪如初夫承天之叙則三時  
有成自中形外則四海蒙福嗟爾庶士諒悉予懷

九年四月壬辰制曰朕誕膺天命以撫方夏兢兢多惕  
保佑惟人懼庶獄之未孚俾一夫之不獲思用哀恤與  
之和寧頃屬夷夏多虞干戈是務徵賦頗重黎元不康  
內迫艱窮外來師旅因行盜竊自陷典刑累然園土之



下佇勦視陰之命永念愚惑惻焉疚心而寰宇之間舉  
類斯衆今火中惟夏長羸及時鬱然沈繫致傷和氣萬  
方有罪在予一人將洽至溥之化更布惟新之理其大  
厯九年四月二十四日昧爽已前大辟罪已下已發覺  
未發覺已結正未結正罪無輕重一切並宜放免敢以  
赦前事相言告者以其罪罪之其在軍將士有刀箭所  
傷久嬰沉疾者戮力疆場致身鋒刃各委所繇量給藥  
物厚加優賞其陣亡將士仰本路隨事優恤妻子各申

錫賚其百姓鰥寡孤獨不能自存者困窮無主誠可哀傷  
仰所在州府長官每事以諸色官物量加贍恤令其得  
所亡命山澤挾藏軍器百日不首復罪如初在宥之典  
既周動植純嘏之錫庶延子孫凡在品彙各宜遷善宣  
示中外諒悉朕懷

十二月壬辰勅京城內見禁囚犯死罪從流流已下罪  
釋放

十年九月壬寅宥京城內見禁囚死罪從流流已下釋

故

十二年六月丁未以旱故詔曰頃屬煩暑差候愆陽積旬  
處於高明之中猶有鬱蒸之嘆而况幽閉獄戶辨對官  
曹俯臨秋期將正時憲重修欽恤之道載弘全宥之仁  
其京城見禁囚犯流已下罪並宜釋放

冊府元龜卷八十八

欽定四庫全書

子部

冊府元龜卷八十九  
九十

詳校官中書臣瞿照

員外郎臣牛稔文覆勘

總校官庶吉士臣何思鈞

校對官中書臣徐步雲

謄錄監生臣張恒

謄錄監生臣官懋弼

欽定四庫全書

冊府元龜卷八十九

宋 王欽若等 撰

帝王部

赦宥第八

唐德宗以大厯十四年五月癸亥即位六月己亥朔御  
丹鳳樓大赦天下自大厯十四年六月一日已前罪無  
輕重常赦不原者咸赦除之寶應元年以後痕累禁錮  
及反逆緣坐等一切洗滌内外文武官三品已上賜爵

一級四品已下加階致仕官同見任天下百姓為戶者  
賜古爵一級內外將相及方面連帥尚父子儀李正己  
李寶臣李忠臣朱泚崔祐甫崔寧李勉李叔明張獻恭  
梁崇義張延賞段秀實陳少游田悅張伯儀朱滔李抱  
真李希烈馬燧崔昭薛邕李道昌李國清吳仲孫李昌  
夔李固清李元忠郭昕孟皞馬崇福李茂康澤姚明敬  
杜佑及李忠誠嚴郢趙惠伯并劉晏侯希逸顏真卿路  
嗣恭王駕鶴等其正己為司徒兼太子太保寶臣為司

空兼太子太傅崔寧李勉各以本官同平章事餘並加  
官及勲封等其乘輿服御量加減省務敦素質天下進  
獻事緣郊祀陵廟所須依前勿闕餘並樽節歸於省約  
士庶自艱難已來田宅踰制車服奢侈仰所司詳前後  
格式明立法度王公百官既處崇班宜知廉慎如省坊  
市之內置邸鋪鬻與人爭利並禁斷仍委御史臺及京  
兆尹糾察諸州府祥瑞珍禽異獸鷹犬之類奇器異服  
錦繡珠玉等並不得輒有進獻諸軍州有與戎狄接境

各守邊疆勿更掩襲無備仍即差使臣宣諭共崇和好  
諸州刺史上佐自今已後準式入計叔祖頴王已下叔  
彭王已下弟蜀王已下大長公主長公主各與一子京  
官郡縣主嗣王郡王各與一子出身二王三恪褒聖侯  
各與一子官在城諸軍將士各賜纁帛武德已來宰臣  
功臣名迹崇高并至德已來將相功效明著已亡歿者  
量加贈諡子孫沈翳者量與官諸州刺史及常叅官父  
見在未有官者量與五品致仕官及階父母歿與贈官



及邑號天下諸使及州府有須改革處置事一切先申  
尚書省委僕射已下衆官商量聞奏外使及州府不得  
輒自奏請或律令格式條目有未折衷者委中書門下  
簡擇理識通明官共刪定自至德已來制勅或因人奏  
請或臨事頒行差互不同使人疑惑中書門下與刪定  
官詳決取堪久長行用者編入條格三司使準式以御  
史中丞中書舍人給事中各一人為之每日於朝堂受  
詞推勘處分憲官諫官常叅官每政事錯綜仰面折廷

爭無有所隱憲司彈奏一依貞觀故事其知匭使先有明勅非不丁寧猶聞壅遏自今已後仰每日諸匭務招遠方達聰明目諸司各舉厥職共守至公天下有才業尤著高蹈丘園及直言極諫之士所在具以名聞其諸色人中有孝弟力田經學優深文詞清麗軍謀宏遠武藝殊倫者亦具以名聞能詣闕自陳者亦聽仍限今年十二月內到朕當親試自今已後更不得令置寺觀及請度人存問耆老恤孤弱不能自存者

建中元年正月辛未有事於南郊還御丹鳳樓大赦天下自正月五日已前大辟已下罪咸赦除之內外文武官賜爵及階勲諸道宜分遣黜陟使觀風俗問疾苦自艱難已來徵賦名目繁雜委黜陟使與諸道觀察使刺史作年支兩稅徵納比來新舊徵科色目一切停罷兩稅外輒別率一錢四等官準擅興賦以枉法論其軍府支計等數準大厯十四年八月七日勅處分九廟子孫非五等新任用始封王廕不限年代東宮官宜擇端厚

之士皇太子時幸大學行齒胄之禮諫議大夫孔述睿  
宜充太子侍讀公卿諸儒議定五經博士其常叅官及  
節度觀察防禦軍使都知兵馬使刺史少尹赤縣及大  
理司置評事授訖三日內於四方館上表讓一人自代  
其外官與長吏附中書門下每官闕以舉多者授之王  
府六品已下官及諸州縣有可併省及諸官要罷減者  
量事廢省天下子為父後者賜勲兩轉

興元元年正月癸酉朔帝在奉天行宮受朝賀畢大赦

天下制曰致理興化必在推誠忘已濟人不吝改過朕  
嗣服丕構君臨萬邦失守宗祧越在草莽不念率德誠莫  
追於既往永言思咎期有復於將來明徵其義以示天  
下小子懼德不嗣罔敢怠荒然以長於深宮之中暗於  
經國之務積習易溺居安忘危不知稼穡之艱難不恤  
征伐之勞苦澤靡下究情未上通事既壅隔人懷疑阻  
猶未省已遂與興戎徵師四方轉餉千里賦車籍馬遠  
近騷然行齎居送衆庶勞止或一日屢交鋒刃或連年

不解甲冑祀奠乏主室家靡依死生流離怨氣凝結力  
役不息田萊多荒暴令峻於誅求疲吐空於杼軸轉死  
溝壑離去鄉閭邑里丘墟人烟斷絕天譴於上而朕不  
寤人怨於下而朕不知遂致亂階變行都邑賊臣乘釁  
肆逆滔天曾莫知愧敢行凌偏萬品失序九廟震驚上  
累於祖宗下負於蒸庶痛心覲貌罪實在予永言愧悚  
若墜淵谷賴天地降祐神祇叶謀將相竭誠爪牙宣力  
羣盜斯屏皇維載張將弘永圖必布新令朕晨興夕惕

惟念前非乃者公卿百寮用加虛美以聖神文武之號  
被蒙闇寡昧之躬固辭不獲俯遂羣議昨因內省良所  
瞿然體陰陽不測之謂神與天地合德之謂聖豈伊淺  
劣所敢當仁文者所以化成武者所以定亂朕自臨御  
於六載化之不被亂用是興豈可苟徇羣情猥當徽號  
重予不德益用懷慙自今已後中外所上書奏不得更  
言聖神文武之號今上元統厯獻歲發祥宜草紀年之  
號式敷在宥之澤與人更始以答天休可大赦天下改

建中五年為興元元年自正月一日昧爽已前大辟罪已下咸赦除之李希烈田悅王武俊李納等有以忠勞任膺將相有以勲舊繼守藩維朕撫馭乖方誠信未著致使疑懼不自保安失於懷柔黷此威武皆由上失其道而下罹其災朕實不君人則何罪屈已弘物予無愛焉庶懷引慝之誠以洽好生之德其希烈武俊田悅李納并所管將吏等一切並與洗滌復其爵位待之如初仍即遣使分道宣諭朱滔雖緣朱泚連坐路遠必不同



謀朕念其舊勲務在弘貸如能效順亦與惟新朱泚大  
為不道棄義絕恩反易天常盜竊名器暴犯陵寢所不  
忍言獲罪祖宗朕不敢赦其應被朱泚脅從將吏百姓  
等或遭扇誘或迫兇威苟能自新理可矜宥但官軍未  
到京城已前去逆效順并散歸本軍者并從赦例原免  
左降官及已經量移并與量移近處流人配隸及罰鎮  
効力並安置及得罪人家口未許歸者一切放還先有  
痕累禁錮反逆緣坐承前恩赦不該者並宜洗雪亡官

失爵放歸勿齒量加收叙未復資者更與進叙諸色降  
黜配隸人中有才能者特加錄用諸軍諸道應赴奉天  
并進收京城將士並賜名奉天定難功臣身有過犯遞  
減罪三等子孫有犯減罪二等諸道將士在行營並超  
三等改官仍各賜勲五轉在本鎮者依資與改官各賜  
勲三轉内外文武官三品已上賜爵一級四品已下者  
加一階仍並賜勲兩轉應囚流貶身死未葬並許其家  
各據本官以禮改葬其所加墊陌錢稅間架竹木柴漆

權鐵之類悲宜停罷其奉天升為赤縣仍給復五年在  
縣城內者給復十年天下有隱居行義晦迹丘園委長  
吏具名聞奏當備禮邀致諸色人中有賢良方正能直  
言極諫并博通墳典達於教化識洞韜畧堪任將帥者  
委常叅官及長吏奏聞諸道貢獻自非供宗廟軍國之  
用一切並停赦書既下人心大悅

七月辛卯御丹鳳樓大赦天下詔曰國家百七十載八  
聖儲慶敷祐下人視之如傷懼天天理未嘗不既富而

教既教而懲有泣辜宥過之惠無作威逞欲之事俾爾  
萬姓嗣續迄今俾予一人纂承及此朕恭膺顧命獲主  
大寶惜於理亂之本溺於因習之安上下否隔賞罰乖  
舛執法以濟衆而犯令愈甚興戎以除害而長亂益繁  
中心浩然罔知攸濟姑務勵力曾微省躬殫財以竭人  
畧內以勤遠中外耗蠹遐邇震駭賊臣蓄奸承釁竊發  
九廟乏祀兆人靡依猘獠肆其吞噬豺狼擾於宮闕去  
歲云半再罹播遷茫茫中原罔有定極烈士殞命暴骸

於草野黔首遭難轉死於溝壑朕實獲戾人其何辜悼  
心慙顏泣血思咎敢憚賁越以幸於厥躬誠懼重辱祖  
宗益縱兇醜忍耻誓志庶復寇讐賴昊穹降威式沮亂  
命將帥戮力恭行天誅士庶宅心不忘先德賜予寡昧  
再受多祜紐乾綱於既紊復天柱於將傾言旋鑄京不  
改舊物宗祧以序朝享有期明發不寐彌增感惕嗚呼  
君者所以撫人也君苟失位人將安仰朕受天明命臨  
御萬方違道任情致寇興禍生靈無告受制兇威苟全

性命急何能擇或虧廢名節或貪冒貨利陷於法紀事  
匪一端究本原情諒非獲已不能撫之以道而又繩之  
以刑豈朕恤人罪已之誠含垢布和之義滌清汚俗與  
物更新可大赦天下自興元元年七月二十日昧爽已  
前大辟罪已下咸赦除之今年五月已前左降官與量  
移内外文武及致仕官三品已上賜爵一級四品已下  
加一階仍並賜勲兩轉司徒兼中書令晟與一子五品  
正員京官侍中瑊與一子六品正員京官駱元光尚可

孤韓遊環戴休顏各與一子七品正員官諸道節度使  
及行在都知兵馬使都虞侯扈從左右金吾六軍大將  
軍各與一子八品正員官都團練使觀察使各與一子  
官收京城將士超八資改轉已甄叙者更與超二資扈  
從及收京城將士及常叅官祖父母在先無官封量授  
致仕官及邑號已亡者與追贈扈從將士三品已上賜  
爵兩級四品已下各加兩階賜勲三轉諸州刺史普恩  
之外賜爵一級四品已下加一階賜太尉秀實天授貞

烈激其頽風蒼黃之中密蘊雄斷將紓國難詭收寇兵  
撓其兇謀果集吾事挺身徑進奪擊渠魁英名凜然振  
邁千古宜差官致祭并旌表門閭緣葬所要一切官給  
及於墓所官為立碑以揚徽烈諸軍將士有身死王事  
委本使具名銜聞奏即與褒贈京兆府百姓普恩之外  
給復一年

貞元元年正月丁酉朔御含元殿受朝賀禮畢大赦天  
下以興元二年為貞元元年李懷光束身歸順以其嘗



有大勲官封如舊諸道進討淮西罪止希烈脅從皆原  
自今特敕正月十一日昧爽已前大辟罪已下咸赦除  
之左降官量移近處流人及罰鎮効力並即放還應有  
痕玷禁錮前後恩赦節文未該及者並宜洗雪李希烈  
僭逆不道誠所難容朕憫念蒼生務息征討頻有詔命  
許其自新若能歸降依前勅待之以不死内外文武見  
任及致仕官三品已上賜爵一級四品已下加一階白  
身人賜勲三轉應奉天興元元年扈從立功并收京城

將士食封者各隨文武與一子官餘並加兩階仍賜勲  
三轉其文武百僚應從到興元府者五品已上賜勲三  
轉其五品已下賜爵一級六品已下加一階合入三品  
五品者不拘考限聽叙其中五品已上父母未經追贈  
者並與追贈司徒兼中書令晟宜與一子五品正員官  
副元帥各與一子五品正員官都統與一子六品正員  
官中書門下平章事充節度使及神策兵馬使六軍統  
軍金吾六軍大將軍判度支侍郎各與一子八品正員

官都團練防禦觀察使京兆河南尹金吾六軍將軍殿  
前射生兵馬使各與一子九品正員官故尚父子儀先  
朝元勲再復京邑贈太尉秀實以死衛國節冠古今各  
宜與子孫一人五品正員官江淮轉運使檢校尚書左  
僕射平章事韓滉勵精勤職夙夜在公漕輓資儲千里  
相繼可進國公關畿之內連歲興戎荐屬天災稼穡不  
稔穀麥翻貴蒸黎困窮倉廩空虛莫之賑贍每一興念  
惻然痛心宜令度支取江西湖南見運到襄州米一十

五萬石設法搬赴上都以救荒饑大長公主長公主各與一子七品官嗣王郡王各與一子出身應陪位皇親三品已上賜爵一級四品五品加一階六品已下及常選官等簡選日優與處分應緣大禮職掌行事及留守副留守內行事中官等三品已上各賜爵一級四品已下加一階人竝賜勲兩轉介公鄴公各與一子官如無子孫賜物一百疋及神策六軍殿前射生英武威武威遠皇城左右金吾街使等諸軍諸使將士御樓立仗及

守本仗者併諸道節度下隨使赴上都帖仗將士等宜  
共賜物十三萬段仍賜勲兩轉

四年正月庚戌朔御丹鳳樓制曰朕以菲薄託於王公  
之上恭承天地之序虔奉祖宗之訓遐想至理思臻太  
和而誠不感物化不柔遠聲教猶鬱征賦仍繁頃者務  
於安人不憚屈己與西蕃結好申以齊盟而我心無厭  
背義虧信刼脅士庶屢犯封疆元元何辜皆朕之失乃  
者輦轂之下兇狂結構上帝垂祐悉自伏誅刑以止殺

諒非獲已今三陽布和萬物資始思與羣公兆庶惟新政理宜敷在宥之澤以覃作解之恩可大赦天下大辟罪已下繫囚見徒常赦所不原者咸赦除之官吏犯賊不在免限流人配隸放還左降官量移近處已經量移者更與量移百姓逋欠一切放免諸州遭水旱委長吏貸種子天下兩稅更審定等第仍加三年一定以為永式涇隴邠寧振武靈鹽夏銀官健常例之外每年加賜兩段軍州官吏寄客能務農業入粟助邊量其多少酬

以官秩天下刺史與一子正員官戶口增加田疇廣闊者長吏加一階縣令簡選優與處分額內官勿更注擬見任者三考勒停百官食錢所欲別置本宜令中書門下與百僚議可否奏京九品已上官各上封事極言得失賢良方正直諫者高蹈不仕隱居巖穴孝弟力田聞於鄉里所在長官具名聞薦諸色官有清白政術堪任刺史縣令者常叅官各舉所知朕當親自策試之諸軍立仗將士共賜物一萬疋陪位蕃客賜一千疋

六年十一月庚午南郊禮畢御丹鳳門下制曰禮稱日至而郊詩美豐年之報然則迎日之始時莫大焉順成之祐慶莫重焉朕承天眷懷俾作神主朝夕砥礪日月永思惟人安化洽是勤惟歲稔時和是冀上靈降鑒豐祉聿臻展禮郊丘申大報之義祇禋宗廟極追孝之誠四海具瞻百神咸秩古者凡有大澤必與天下樂之慶賜遂行無思不備内外文武及致仕官并諸將士等三品已上賜爵一級四品已下加一階宰相及東都留守



六軍統軍諸道節度神策神威金吾六軍及都團練防  
禦觀察使京兆河南尹正員尚書御史臺長官太常卿  
各與一子官大禮行事官各加一階立仗將士及守本  
營者共賜物十八萬端足故尚父子儀與一子五品正  
員官如已五品已上量與改轉贈太尉秀實與一子官  
張巡許遠南霽雲顏真卿顏杲卿各與一子正員官天  
下見禁囚徒罪至流死者各遞減一等徒罪已下一切  
放免左降官經三考流人配隸効力之類經三周年者

普與量移近日州縣官吏專殺立威杖或踰制自今已  
後有責情決罰致死者宜令本道觀察使具事繇聞奏  
并申報刑部御史臺吐蕃比虧信約自絕通和邊鎮之  
間事資備禦因其犯邊累獻俘囚既切懷歸之心復加  
幽繫之苦永言覆育宜問華夷應所獲吐蕃生口見在  
者一切放歸本國仍並遣人送至界首量事資遣使得  
自全應諸道自艱難已來戰陣喪歿及荒凶死亡骸骨  
暴露者長吏各令收瘞奠醑守宰之任獎在數更自今

刺史縣令以四考為限嗚呼朕獲主珪璧十有二年於茲天地明察罔敢不祇一日萬思罔敢不慎遷已之過庶無吝心致人之安實有明志夫祀之馨香在德天之視聽在人惟命不常聖有謨訓慶感既集於茲日儆厲方戒於將來冀勉增修聿懷多福凡百有司所宜同之九年十一月乙酉日南至郊祀禮畢御丹鳳樓大赦天下制曰朕以寡德祇膺天命勵精理道十有五年夙夜惟寅罔敢自逸小大之務莫不祇勤皇靈顧懷宗社垂

祐年穀豐阜荒服會同遠至邇安中外咸若永惟多祐  
實荷玄休是用虔奉禮章躬薦郊廟克展因心之敬獲  
申報本之誠慶感茲深休惕惟屬可大赦天下自貞元  
九年十一月十日昧爽已前大辟罪咸赦除之左降官  
及流人並量移近處内外文武見任及致仕官并諸軍  
諸使將士等三品以上賜爵一級四品已下加一階將  
士白身者賜勲兩轉緣大禮職掌行軍法駕南郊後留  
守副守及太倉左藏庫及陪位官等三品已上更賜爵

一級四品已下加一階及諸色應陪位官等各賜勲兩  
轉親王大長公主長公主嗣王郡縣主鄮公介公鴻臚  
蕃客神策神威六軍及諸使應緣大禮宿衛御樓立仗  
及守本軍本營者諸道節度在京帖仗將士賜物有差  
宰輔及在方鎮者祖父各與追贈東都留守諸軍節度  
觀察都防禦都團練經畧鹽鐵轉運使左右神策神威  
六軍等統軍大將軍英武威遠軍使戶部侍郎判度支  
及京文武三品已上正員官尚書省四品官中書門下

省御史臺五品官父在未有官者量授檢校官已有官者加一階母在未有邑號者授邑號已有邑號者更進邑號父母亡歿者各與追贈應諸軍防秋兵馬使及別敕定名充邊地兵馬使等備禦勤勞所宜優異其父在未有官者各授檢校官母在未有邑號者各授邑號邊軍鎮守及諸道諸軍防秋將士經三週年未改轉者宜與甄叙其九廟配享功臣封爵廢絕者宜令詔封以享祀故尚父子儀贈太尉秀實宜與一子六品正員官天

下有才德高遠為衆所知及隱遯丘園不求聞達者委  
所在州府長吏具名迹聞薦諸色人中有賢良方正能  
直言極諫或博通墳典達於教化或詳明政術可以理  
人者委常叅官及州府長吏各舉所知聞奏朕當親自  
策試諸司官有陳時政得失各盡所見條流封進人有  
冤滯事有闕遺悲當極言無所隱避

十年四月癸卯司天監言日食雲陰不見百官表賀是  
日釋京師繫囚

順宗以貞元二十一年正月即位二月甲子御丹鳳門  
大赦天下制曰朕承天序嗣守鴻業以不明不敏託於  
萬國兆人之上永惟高祖太宗肇啓區夏列聖休德洽  
於人心肆惟寡昧膺受多福大懼不克負荷為宗廟羞  
若涉大川罔知攸濟思與羣公卿士方伯連帥祗若丕  
訓惟懷永圖內熙庶績外弘至化以弼於理臻於大中  
俾懷生之類各遂其性咸得自新道迎休和蕩滌瑕累  
可大赦天下自貞元二十一年二月二十四日昧爽已



前大辟罪已下罪無輕重已發覺未發覺已結正未結  
正繫囚見徒常赦所不原者咸赦除之左降官並移近  
處如復資者任依常調赴選如有親故在上都任於所  
司陳狀便與處分別敕因責投降資正員官者亦進改  
亡官失爵放歸不齒者量加收叙流人放還僧尼道士  
移隸者罪人已亡歿家口未許歸者一切放歸如自情  
願住者勿拗令歸如先有勅去縱逢恩赦不在放還之  
限者及別勅安置者並宜放還其安置之人五品已上

待進止左降官及流人亡歿有官者各還本官今日已前痕累禁錮及反逆緣坐一切並與洗滌應緣山陵制度及喪儀禮物博詢可否務遵禮度必誠必信副朕衷懷橋道置頓並以内庫錢充諸有費用先給功價仍以見錢更不折物不得輒令科配天下百姓應欠貞元二年二月三十日已前權酒及兩稅錢物諸色逋懸一物已上一切放免京畿諸縣應今年秋夏青苗錢並宜放免天下諸州府應須夫役車牛驢馬腳價之類並以兩

稅錢自備不得別有科配仍並依兩稅元勅處分仍永  
為常式不得擅有諸色權稅常貢外不得別進錢物金  
銀器皿奇紋異錦雕文刻鏤之類若已發在路者並納  
在藏庫清淨者理國之本恭儉者修己之端朕臨御萬  
邦方弘此道苟可濟物予何愛焉宮掖之中宜先省約  
其後宮弟子音聲人等並宜放歸親族應緣宮市並出  
正文帖仍依時價買賣不得侵擾百姓所緣宮中要妳  
母並取食糧戶充稅不得科配寺觀諸軍先擒吐蕃生

口配在諸處者宜資給放還本國天下官吏應行鞭撻  
本罪不致死者假以責情致令殞斃每念於此良增惻  
然宜切加察訪内外文武見任及致仕官并諸道將士  
等賜爵加階賜勲有差二王三恪褒聖侯各與一子官  
大長公主嗣王等各與一官及出身有差宗子中有才  
用者委宗正卿以名聞量才叙用皇王等已上親賜爵  
加階有差陪位者年十五已上並放出身武德已來配  
饗功臣及張巡許遠南霽雲顏杲卿顏真卿等子孫中

各與一人正員官故尚父子儀贈太師晟太尉秀實子  
孫中各與一人正員五品官及諸州府長官及京常叅  
官父見在未有官者並與五品致仕官及階父歿母存  
者與邑號父母亡歿量與追贈陝州元從寶應功臣興  
元元從奉天定難功臣賜爵勲有差亡歿者與追贈中  
書門下節度使東都留守度支鹽鐵等使京兆尹觀察  
招討等使及神策神威金吾六軍將軍大將軍英武威  
遠鎮國軍使隴右經畧軍使節度留後各與一子官有

差其神策神威六軍將軍大將軍英武軍等使並與加  
官神策神威六軍英武威遠營左右金吾及皇城將士  
及緣御樓立仗將士等賜物及爵階有差應東宮官及  
侍讀侍書教授在正月二十六日已前者有國已來職掌  
行事及冊命官授顧命撰制詔及修冊文并寫制詔官  
等賜爵加階勲進改有差蕃客等共賜物一千八百七  
十疋義武軍節度使下官健在城立仗共賜物三千八  
百四十五疋立仗將士等量加改轉內侍省及內防官

正諸道進奏院及奏事官賜爵階勲有差內外五品已上文官及臺省常叅官宜至四考滿與改轉中外遞遷量才叙用其中政績尤異須甄升者不在此限常叅官及諸州刺史有先得替及假百日經喪去官未授官者並即與進擬百司及在城諸使息利本錢徵放多年積成深弊內外官料錢職田等厚薄不均兩稅及諸色權稅物重轉須有損益並宜委中書門下與逐司商量具利害條件以聞不得擅有開糴禁錢務令通濟諸色人

中有才識兼茂明於體用者經術精深可為師法者達於吏理可使從政者宜委常叅官各舉所知其在外者長吏宜精加訪擇具以名聞仍優禮發遣朕當詢事考言審其才實如無人論薦者即任自詣闕應內外官及諸色人任上封事極言時政得失有可觀者別當甄獎百姓九十已上版授及賜各有差仍令官吏就家存問順孫孝子義夫節婦旌表門閭重加優恤

四月戊申詔曰惟先格王光有天下必正邦本以立人



極建儲貳以承宗祧所以啟迪大猷安固洪業斯前代之令典也皇太子純體仁秉哲恭敬溫文德叶元良禮當上嗣朕奉若丕訓憲章古式永惟社稷之重載考春秋之義授之七鬯以奉粢盛爰以令辰俾膺茂典今冊禮云畢慶感交懷思與萬方同其惠澤自貞元二十一年二月二十四日已後至四月九日昧爽已前天下應犯死罪者特降從流流罪已下各減一等文武官常叅官及諸州府長官子為父後者賜勲兩轉古之所以教

太子必茂選師友以輔翼之俾法於訓詞而行其典禮  
左右前後罔非正人是以教諭而成德也給事中陸贄  
中書舍人崔樞積學懿文守經據古以叅講習庶叶於  
中可充皇太子侍讀天下孝子順孫先旌表門閭者委所  
管州縣各加存恤五嶽四瀆名山大川委所在長吏量  
加祭禮

永貞元年八月辛丑傳位於皇太子帝稱太上皇居興  
慶宮下詔曰有天下者傳歸於子前王之制也欽若大

典斯為至公式揭耿光用體文德朕獲奉宗廟臨御萬  
邦降疾不瘳庶政多闕乃命元子代子守邦爰以令辰  
光膺冊禮以今月九日冊皇帝於宣政殿乃命檢校司  
徒平章事杜佑充冊使門下侍郎平章事杜黃裳為副  
使國有大命恩俾惟新宜因紀元之慶用覃在宥之澤  
宜改貞元二十一年為永貞元年八月五日昧爽已前  
天下應犯死罪特降從流流罪已下各降一等

憲宗元和元年正月丁卯御含元殿受朝賀禮畢御丹

鳳樓大赦天下制曰朕聞明王之以孝理也必先之以博愛臨之以莊敬繇一人之至德鼓四表之懽心臻於太和以育庶類則下知禁而無犯上措刑而勿用斯道不遠弘之在予朕以寡昧嗣守丕業荷累聖之鴻休稟太上之嚴訓夙夜寅畏不敢荒寧承顏而退省萬機問寢而下臨四海虔奉帷眷施於兆人皇王以來孰有斯慶端本之化自予躬行總百行之源刑四方之理推恩以覆育廣敬以昭事王者要道朕其庶乎則日月之燭

照可以率俾昆蚩之涵養期於不夭是必家至日見而後化洽刑清圖始所難慎終斯勉猶恐下愚之人因循陷辟官師之長教道未明殄於飢寒遂愆禮節誑誤之網顧失政而多途哀矜之人雖得情而勿喜思與公卿大夫下及士庶人勵翼循省以圖將來其因體元之始覃此惟新之澤上報於君父下念於蒼生頒慶紀年鴻恩斯洽可大赦天下改永貞二年為元和元年自元和元年正月二日昧爽已前大辟罪已下常赦所不原者

咸赦除之京畿諸縣今年青苗錢及權酒錢並宜放免地稅率於每年斛量放二升江淮荆襄等十州管內水旱所損四十七州減放米六十萬石秋稅錢六十萬貫內外文武見任在官神策六軍諸道將士等各賜爵加勳自武德已來功臣子孫與官及出身文武常叅官觀察節度團練經畧使刺史六軍大將等父母亡歿與封賜至德以來任宰輔與追贈及謚陝州奉天元從功臣普恩之外更賜勳爵中書門下及外使宰相宜與一子七

品官東都留守六軍大將等與一子出身東宮官並與改官其撰冊文官等與一子官及勲爵有差天下百姓高年者賜米帛羊酒國子監祭酒司業及學官並先取朝廷有德望學識者充東都國子監諸館共置學生百員應天下州府每年所稅地子數內宜十分取二均充常平倉仍各逐當處穩便收貯以時價糶糶務在救人九月西川劉闢平十月詔曰西川諸州鎮刺史大將軍及叅官佐吏將健百姓等應被脅從補職掌一切不問

二年正月辛卯有事於南郊還御丹鳳樓大赦天下制  
曰朕聞王者大孝業莫盛於配天國之大事禮莫尊乎  
享帝故二儀合祭知上天所予之仁萬國駿奔觀聖人  
嚴父之道教之所設禮極於斯我國家宗武祖文繼天  
撫運聲名所被車書必同承祧而御極業光十聖體元  
而紀號年將二百朕以微眇續奉昌圖畏此洪業若臨  
深谷而大事所屬仙寢維營凶德相挺兩隅皆阻淮湖  
輿壤水旱愆期愆然疚懷懼不克濟既而上天降祐烈



祖垂休妖氛盡殄逆節咸伏精稷有以相盪善惡有以  
相資五兵纔試而復藏四氣應序而咸理物皆滋茂歲  
亦豐登百姓之心懽然相與是用齋精三日款謁上玄  
明發不寐祇見烈祖周旋在位陟降是依克配之禮既  
展如在之誠增慕嘉此福祐與物惟新式敷顓若之化  
俾洽霈然之澤可大赦天下罪無輕重常赦不原者咸  
赦除之左降官與量移及復資仍聽累叙流移配隸並  
放還天下應有逋欠在百姓腹內者及京畿今年夏青

苗錢並放免官酤酒及新榷率並同禁斷淮南江南去年已來水旱疾疫其稅租節級蠲放天下兩稅貞元四年制書已令三年一定委有司舉舊勅商量處置諸道年終勾宜停刺史錄事叅軍並不得擅離州其事類已後制勅速令有司刪定江淮大縣每歲據闕委三省御史臺諸司長官節度觀察使各舉堪任縣令不限選數並許赴集臺省官及刺史亦令有闕先於縣令中揀擇如有能否與元舉人同賞罰復置具員簿以序内外庶

官禁郵驛假託乘券京兆府諸司色役人各令條疏簡  
省天下官吏應行鞭捶責情至死切令察放王府六品  
已下官及諸州縣有獄并省處及諸官諸使有要停減  
者委有司商量廢省天下百姓不得冒為僧尼道士以  
避徭役其創造寺觀廣興土木者舉勅處分内外文武  
見任及致仕官諸軍將士等以品秩節級賜勲爵文宣  
王及二王三恪公主諸與一子官仍賜物有差宗子中  
有才用者委中書門下量才叙用故尚父子儀太師晟

太尉秀實顏真卿顏杲卿張巡許遠南霽雲及配饗功臣與一子官及出身有差至德已來功臣未配饗者速令詳定文武常叅官及諸道節度觀察使等并諸軍使並與父母封及追贈并一子官及出身有差諸軍身仗及在本營節級賜物應緣大禮職事官並賜階爵天下諸色人中有賢良方正能直言極諫博通墳典達於教化軍謀宏遠堪任將帥詳明政術可以理人委内外官各舉所知當親策試天下百姓高年者贈米帛羊酒物

及版授官封名山大川及古聖帝明王忠臣烈士各令以禮致祭

三年正月癸巳御宣政殿受徽號曰睿聖文武皇帝冊禮畢移仗御丹鳳樓大赦天下自今已後應諸道有除官赴闕受代至京不得取本道錢妄稱進奉

四年十月庚寅冊皇太子癸巳制曰朕丕承寶圖撫有方夏夙夜寅畏不敢荒寧永惟祖宗之洪業厯考皇王之令典思所以垂統立極事神保乂推明至公安固大

本尊廟祧而主七鬯嚴社稷而奉粢盛俾開春闈乃命  
元子斯古今之通誼也皇太子寧清明體仁莊敬好禮  
挺忠孝之節一君親之誠允諧詢謀用建儲貳爰以吉  
日冊於明庭鍾鼓載和文物大備盛禮云畢慶感良深  
是宜布澤施恩自中達外厥有前燭舉而行之自元和  
四年十月八日昧爽已前天下應犯死罪殺人者降從  
流流罪已下遞減一等左降官未經量移者與量移文  
武常叅官及諸州府長官子為父後者賜勲兩轉應緣

冊禮行事官賜階及勲爵有差鄧王府官量與改進夫  
輔翼元良教諭成德使目睹正事耳聞正言刑於施為  
漸於心術非齋莊忠慤之士不在茲選工部侍郎歸登  
給事中呂元膺並踐履端方行義修潔通於經訓而得  
其要達於教化而蹈其中侍講承華師範磐石訪乃公  
義副予精求並可克皇太子諸王侍讀登宜加一階元  
膺宜賜紫金魚袋天下孝子順孫先旌表門閭者委所  
管州縣各加存恤五嶽四瀆名山大川委所在長吏量

加祭祀

七年十月庚戌制曰王者司牧黎元紹膺統緒必建儲貳以稱家邦故春秋垂冢祀之文易象著震方之位朕屬承景運嗣守丕圖稽前王之令謨奉烈聖之彛訓上以嚴宗祧之顧下以繫億兆之心無疆之休用崇主鬯祇荷成懿敢怠於懷皇太子忠孝溫文率義繇禮寬粹莊重自誠而明慶靈所積姿器夙茂能辨南陽之牘允符東海之貴承華載序所感則深永為固本為慶滋大



宜弘欽恤之令亦覃命賜之恩與衆共之無恩不被自  
元和七年十月十七日昧爽已前天下應犯死罪殺人  
者遞減一等左降官流人並與量移如因流貶所亡殁  
及得罪之人并任歸葬文武常叅官及諸州府長官子  
為父後者賜勲兩轉應緣冊皇太子行事官加階賜勲  
爵有差文武常叅官及陪位官并宗子諸親賜勲一轉  
遂至王府量與進改天下孝子順孫先旌表門閭者及  
高年廢疾者委所管州縣各加存恤五獄四瀆名山大

川委所在長吏量加祭祀布告遐邇咸使知聞

十三年正月乙酉朔帝御含元殿受朝賀禮畢御丹鳳樓大赦天下詔曰朕聞王者法天作則與衆守邦奉公無私居兆人上當恭己嚮方之際切臨深馭朽之懷憂勤靡遑今古何遠所重者兵革不試軌度自貞熙仁扇和以至大道朕顧惟菲德祇奉睿圖承昊天之眷命繼烈聖之不緒旻食以求至理虚心而候昌言兢兢業業常懼失墜逮今十有四年矣道且希於廣運意常在於

包荒推誠則深感物未至頃歲蜀川浙右怙亂阻兵人  
神共誅剪滅相次姑務偃革期於措刑方蕭灼以懲姦  
庶干羽以成化而淮蔡寇孽稔禍挺災問罪興師盖非  
獲已每念征行之暴露軫餽給之煩勞中宵惕然載益  
祇勵妖覓既殄黎庶用康斯皆宗社垂休中外協力將  
勤恤於下土冀昭荅於上玄茲朕所以思與羣公卿士  
勵精於庶政也屬獻歲發春授時惟敬勾萌盡達幽摯咸  
蘇徽纒可矜鰥恤存念俾臨網之是決與慶澤之惟新

可大赦天下元和十三年正月十日昧爽已前大辟罪  
已下咸赦除之惟官典犯賊不在此限左降官及流人  
移隸等並與量移近處別勅因責降授正員官所司亦  
與處分其淮西管內縱有迹同惡逆掛涉流言事在往  
時一切不問如聞申光蔡汝四州百姓干戈之後餓殍  
為病宜委所在長吏設法經理先入擒吳元濟立功將  
先委韓弘條疏宜速具功勞等第聞奏待有甄獎處分  
天下諸州府百姓兩稅之外輒不得更有差率已頻申

勅尚恐因循宜委御史加糾察其諸道州府縣用兵已  
來或慮有權置職名及擅加科配事非永制者一切禁  
斷淮西側近應緣資給軍用權稅經奏請者各委條疏  
傳省王承宗若束身赴闕捨而不問仍加官爵其度支  
元和二年已前諸道借假及懸欠錢物斛斗雜物當四  
百八十餘萬貫石端足枚具斤兩等並放鹽鐵戶部諸  
監院應有欠負亦疏理減放二王三恪及文宣公各賜  
物五十疋神策六軍威遠金吾及皇城等緣御樓立仗

將士等及在城蕃客各賜物有差故尚父子儀贈太尉  
秀實杲卿真卿張巡許遠南霽雲與一子官出身有差  
中書門下及文武常叅官諸道節度觀察神策諸軍等  
使祖父母節級與贈封官存者量與致仕及邑號天下  
百姓高年賜米帛羊酒有差

十四年七月己丑御宣政殿羣臣冊上尊號禮畢御丹  
鳳樓大赦天下制曰朕聞惟人戴后因事必極於推尊  
惟辟奉天有善必歸於讓德式敷景福以答玄功居有

勞謙之思進多滿假之懼緬自遠古何嘗不因是而致  
理焉朕獲纘睿圖祇奉神器上奉大祭下安羣生恭已  
臨軒兢懷馭朽志欲周於四海而念常切於一夫肝食  
宵興惟恐失墜運屬休泰時丁小康方隅廓清氛祲銷  
盪斯乃上荷乾坤之垂祐宗社之降靈下賴卿士之叶  
心戎臣之宣力端拱嚮道推誠任能豈予寡昧用集丕  
績况至化猶鬱勤憂未寧而中外諸臣文武多士累陳  
懇疏並進昌言願獻鴻名以增虛美拒衆心而率籲轉

切顧眇身而內愧靡安乃選吉辰爰受典冊禋告於清廟虔聞於昊天當茲盛儀夕惕增勵於戲朕自御極再加景號在徽章而孔備諒浮實而多慚宜因行慶之辰誕布惟新之澤與時咸遂永孚於休可大赦天下自元和十四年七月十二日昧爽已前大辟罪已下咸赦除之唯故殺人及官典犯賊不在此限左降官量移如復資者即任便赴選亡官失爵放歸不齒者量加收叙前資見任官如因瑕累未階錄用并左降官事情可恕才



行足稱者並宜簡拔獎用淄青舊管內官人將士百姓  
等縱有跡同惡逆掛涉流言事在當時一切不問京畿  
今年秋稅青苗及權酒錢每貫量放四百文從元和五  
年至十年已前諸縣百姓欠負錢物斛斗等委京兆府  
疏理減放淮南浙江東道宣歙江南西道湖南福建山  
南東道荆南等道今年秋稅錢合上供者每貫量與減  
放度支鹽鐵戶部應有逋懸並委本司疏理具可放數  
奏聞比來州縣多不定戶貧富變易遂成不均前後頻

有制勅長吏不盡遵守今宜三年一定必使均平內外  
文武見任及致仕官三品已上賜爵一級四品已下加  
一階仍賜勲兩轉神策六軍金吾皇城威遠諸道將士  
經淮西淄青兩度立功者更賜勲兩轉二王三恪及文  
宣公神策六軍金吾皇城威遠等諸軍應在城內蕃客  
並節級賜物侍中韓弘讀冊官崔羣讀寶官皇甫鏞並  
各加一階已至三品者賜爵二級撰冊文官崔羣與一  
子正員官其餘應職行掌事官加階賜爵勲有差故尚

父子儀贈太師晟贈太尉秀賢及張巡許遠南霽雲顏  
真卿杲卿子孫各與官及出身寶應與元功臣各賜勲  
爵天下諸色人有賢良方正能直言極諫博通墳典達  
於教化軍謀宏遠堪任將帥詳明政術可以理人者委  
內外官各舉所知當親自策試委中書門下選黜陟使  
分巡天下百姓高年者頒賜有差

冊府元龜卷八十九